

REGIONAL NEWS

UNIT

ALL INDIA RADIO, AGARTALA

Date:09-07-2024

Time: 07.35-07.40 AM Hrs

BENGALI MORNING BULLETIN

Kidney Transplant :

রাজ্যে এই প্রথম সাফল্যের সঙ্গে কিডনি প্রতিস্থাপন করা হয়েছে। ত্রিপুরা সরকারি মেডিক্যাল কলেজ ও জিবিপি হাসপাতালে গতকাল এক যুবকের দেহে কিডনি প্রতিস্থাপন করা হয়েছে। বর্তমানে কিডনি দাতা এবং গ্রহীতা দুজনেই সুস্থ আছেন। গতকাল এক সাংবাদিক সম্মেলনে জিবি হাসপাতালের মেডিক্যাল সুপার শংকর চক্রবর্তী একথা জানান।

সুপার জানান, কিডনি প্রতিস্থাপনের সব ব্যয় বহন করেছে রাজ্য সরকার। তিনি আরো জানান, রাজ্যে কিডনি প্রতিস্থাপনের লক্ষ্যে কিছুদিন আগেই মনিপুরের সিজা হাসপাতালের সঙ্গে রাজ্য সরকারের পাঁচ বছরের জন্য সমঝোতাপত্র সাক্ষরিত হয়।

এদিকে, গতকাল মুখ্যমন্ত্রী প্রফেসর ডা: মানিক সাহা বলেন, বর্তমান সরকারের আন্তরিক প্রচেষ্টার ফলেই কিডনি প্রতিস্থাপনের মতো গুরুত্বপূর্ণ অস্ত্রপচার রাজ্যে শুরু হয়েছে। শুধু তাই নয় রাজ্যে স্বাস্থ্য পরিষেবার উন্নয়নের ফলে এখন বহু জটিল রোগের সফল অস্ত্রোপচার সম্ভব হচ্ছে বলেও তিনি উল্লেখ করেন ।

Foundation Stone Laying-CM :

মুখ্যমন্ত্রী অধ্যাপক ডা: মানিক সাহা গতকাল আগরতলার সেন্ট্রাল রোডস্থিত শিববাড়ী প্রাঙ্গণে অমরুত ২.০ প্রকল্পে তিনটি জলাশয়ের সংস্কার ও সৌন্দর্যায়ন কর্মসূচির ভিত্তিপ্রস্তর স্থাপন করেন। এগুলি হল - সেন্ট্রাল রোড পুকুর, উজান অভয়নগর বাজার জলাশয় এবং উজান অভয়নগরের ভেটেরিনারি হাসপাতালের জলাশয়। অনুষ্ঠানে মুখ্যমন্ত্রী বলেন, স্মার্ট সিটি প্রকল্পে আগরতলা শহরের অনেকগুলো জলাশয়ের সংস্কার ও সৌন্দর্যায়নের কাজ ইতিমধ্যেই সম্পন্ন হয়েছে। পাশাপাশি আগরতলা শহরকে পরিষ্কার পরিচ্ছন্ন রাখতে ও নাগরিকদের সচেতন হতে তিনি আহ্বান জানান ।

অনুষ্ঠানে অন্যান্যদের মধ্যে উপস্থিত ছিলেন - আগরতলা পুর নিগমের ডেপুটি মেয়র মনিকা দাস দত্ত, মেয়র পারিষদ হীরালাল দেবনাথ, কর্পোরেটর রত্না দত্ত, কমিশনার ডা শৈলেশ কুমার যাদব প্রমূখ ।

PM, Russia :

প্রধানমন্ত্রী নরেন্দ্র মোদি তিন দিনের রাশিয়া ও অস্ট্রিয়া সফরে গতকাল সন্ধ্যায় মস্কো পৌঁছেছেন। মস্কো বিমানবন্দরে তাঁকে স্বাগত জানান রাশিয়ার প্রথম উপপ্রধানমন্ত্রী ডেনিস মান্টুরভ। আজ ভারত ও রাশিয়ার মধ্যে ২২তম বার্ষিক শীর্ষ সম্মেলনের সময়, প্রধানমন্ত্রী মোদী এবং রাশিয়ান রাষ্ট্রপতি ভ্লাদিমির পুতিন প্রতিরক্ষা, বাণিজ্য সংযোগ, বিনিয়োগ সম্পর্ক, শক্তি সহযোগিতা, শিক্ষা, সংস্কৃতি সহ নানা দ্বিপাক্ষিক বিষয় নিয়ে পর্যালোচনা করবেন। এছাড়া, প্রধানমন্ত্রী আজ রাশিয়ায় ভারতীয় সম্প্রদায়ের সঙ্গেও মতবিনিময় করবেন।

RAHUL GANDHI :

লোকসভায় বিরোধী দলনেতা রাহুল গান্ধী, গতকাল মনিপুরে হিংসাদীর্ঘ চূড়া-চাঁদপুর ও জিরিবামের ত্রান শিবিরে গিয়ে ক্ষতিগ্রস্তদের সঙ্গে কথা বলেন ও পাশে থাকার বার্তা দেন। এর আগে তিনি, অসমের বন্যা কবলিত কাছাড় জেলার বন্যা দুর্গতদের সঙ্গেও দেখা করেন। এক্স হ্যান্ডলে এক বার্তায় শ্রী গান্ধী অসমবাসীর সাম্প্রতিক বন্যায় ক্ষয়ক্ষতির জন্য দুঃখ প্রকাশ করেন ও সবরকম সহায়তার জন্য কেন্দ্রের কাছে অনুরোধ জানান। উল্লেখ্য, বিরোধী দলনেতা হিসেবে তাঁর এটাই প্রথম উত্তর-পূর্বাঞ্চল সফর।

Panchayet Election :

রাজ্যে ত্রিস্তর পঞ্চায়েত নির্বাচনের দিনক্ষণ চলতি সপ্তাহেই ঘোষণা করা হবে গতকাল রাজ্য নির্বাচন কমিশনার শরদিন্দু চৌধুরী একথা জানিয়ে বলেন, এবারের পঞ্চায়েত নির্বাচন হবে ব্যালট পেপারে। এই নির্বাচনে রাজ্যের ৩৫টি ব্লকে ৩৫ জন পর্যবেক্ষক নিযুক্ত করা হবে।

Panchayat Election preparation Congress :

পঞ্চায়েত নির্বাচনে প্রতিদ্বন্দ্বিতা করার লক্ষ্যে গতকাল সাব্বরুমে কংগ্রেস দলের এক বৈঠক অনুষ্ঠিত হয়। বৈঠকে প্রদেশ কংগ্রেস সভাপতি আশীষ কুমার সাহা, দলের দক্ষিণ জেলার সভাপতি মৃদুল পাটারী প্রমুখ উপস্থিত ছিলেন। সভায় সাব্বরুম মহকুমার সাতচাঁদ ও পোয়াংবাড়ি ব্লকের প্রতিটি গ্রাম পঞ্চায়েত, পঞ্চায়েত সমিতি ও জেলা পরিষদের আসনে কংগ্রেস দল এককভাবে প্রতিদ্বন্দ্বিতা করার সিদ্ধান্ত নিয়েছে বলে প্রদেশ কংগ্রেস সভাপতি আশীষ কুমার সাহা জানিয়েছেন ।

Governor :

রাজ্যপাল ইন্দ্রসেনা রেডিও নাগ্নু গতকাল আগরতলার নন্দনগরে ডনবক্ষো বিদ্যালয়ের রৌপ্যজয়ন্তী অ্যানেক্স বিল্ডিং-এর উদ্বোধন করেন। অনুষ্ঠানে বক্তব্য রাখতে গিয়ে তিনি বলেন, সমাজ গঠনে শিক্ষার গুরুত্বপূর্ণ ভূমিকা রয়েছে। সৌহার্দপূর্ণ ও শান্তিপূর্ণ পরিবেশ বজায় রাখার ক্ষেত্রে শিক্ষার বিরাট অবদান রয়েছে। এছাড়াও রাজ্যপাল, বিদ্যালয়ের ছাত্রছাত্রী ও শিক্ষক-শিক্ষিকাদের সঙ্গে মত বিনিময় করেন।

Union Minister :

দুই দিনের সফরে কেন্দ্রীয় পর্যটন, পেট্রোলিয়াম ও প্রাকৃতিক গ্যাস মন্ত্রকের প্রতিমন্ত্রী সুরেশ গোপী আজ রাজ্যে আসবেন। আজ আগরতলার সরকারী অতিথিশালায় রাজ্যের পর্যটনমন্ত্রী সুশান্ত চৌধুরী কেন্দ্রীয় মন্ত্রীর সঙ্গে বৈঠক করবেন ।

Third Division League :

ঘরোয়া তৃতীয় ডিভিশন লিগ ফুটবল প্রতিযোগিতার গতকাল দুটি খেলা অনুষ্ঠিত হয় । উমাকান্ত মিনি স্টেডিয়ামে অনুষ্ঠিত খেলায় স্বামী বিবেকানন্দ ক্লাব ১১-০ গোলে সবুজ সংঘকে হারিয়ে দেয়। একই মাঠে অপর খেলায় জম্পুইজলা প্লে সেন্টার ৮-০ গোলে কেশব সংঘকে পরাজিত করে।

Weather :

আবহাওয়ার পূর্বাভাসে বলা হয়েছে, আকাশ সাধারণত: মেঘলা থাকবে। রাজ্যে কয়েকটি জায়গায় দু'এক পশলা বৃষ্টি বা বজ্রসহ বৃষ্টিপাতের সম্ভাবনা রয়েছে। আজ দিনের সর্বোচ্চ তাপমাত্রা থাকবে ৩৩ ডিগ্রি সেলসিয়াসের কাছাকাছি । আগরতলায় আজ সকালে সর্বনিম্ন তাপমাত্রা ছিল ২৭.২ ডিগ্রি সেলসিয়াস। গত ২৪ ঘন্টায় বৃষ্টিপাত সামান্য ।
